

MINISITERAN'NY FITATERANA SY NY FAMANTARANA NY
TOETRANDRO

SEKRETARIA JENERALY

FOIBE FAMANTARANA NY TOETRANDRO

FITALEAVANA NY FIKAROHANA SY FAMPANDROSOANA
HYDROMETEOROLOJIKA

SAMPAN'ASA MISAHANA NY FAMPIHARANA NY TOETRANDRO

GAZETY ISAM-BOLANA MOMBA NY TOETRANDRO SY NY FAMBOLENA

Nivoaka ny 05 Jolay 2026


Fintina:

- A- Toetry ny rotsakorana volana Jona 2026.
 - B- Jery todiky ny toetrandro sy fambolena volana Jona 2026.
 - D- Vinan'ny rotsakorana ho an'ny volana Jolay 2026.
 - E- Vinan'ny toetrandro manoloana ny fambolena ho an'ny volana Jolay 2026
- Torolàlana ho fanamorana ny famakiana ity gazety ity.
Fifandraisana


A- TOETRY NY ROTSAKORANA TAMIN'NY VOLANA JONA 2026

Nandritra ny volana **Jona 2026**, ireo faritra manamorona ny morontsiraka atsinanan'i Madagasikara no nahazo orana (nahazo rotsak'orana mihoatra ny 100 mm). Ny faritra hafa kosa dia nahazo orana latsaky ny 50 mm (Sary 1)

Raha oharina tamin'ny volana Jona 2025, dia nahazo orana betsaka kokoa ny faritra **Atsimo Atsinanana, Anosy** tamin'ny Jona 2026. Ho an'ny ankamaroan'ny faritra hafa dia tsy nisy fahasamihafana lehibe teo amin'ny habetsahan'ny rotsak'orana tamin'ireo taona roa ireo (Sary 2).



Sary 1. Rotsakorana ny volana Jona 2026




Sary 2. Fampitahana ny rotsakorana Jona 2026 sy Jona 2025


Araka ny **SPI1** (Indice Normalisé des Précipitations mandritra ny iray volana), dia nahitana orana ambony noho ny salan'isa mahazatra tany amin'ny ampahany amin'ny faritra **Atsimo Atsinanana** sy **Fitovinany**. Ho an'ireo faritra hafa manamorona ny morontsiraka atsinanana kosa dia manondro rotsak'orana manakaiky na ambanin'ny salan'isa mahazatra ny SPI1 (Sary 3).

Ny **SPI3**, izay mampitaha ny fitambaran'ny rotsak'orana tamin'ny volana Aprily, Mey ary Jona 2026 amin'ny salan'isa mahazatra, dia mampiseho fa ambanin'ny salan'isa ny orana tao anatin'ireo telo volana ireo tany amin'ny ampahany amin'ny faritra **Sava, Ambatosoa, Alaotra Mangoro (faritra Mangoro), Atsinanana ary Anosy**. Ho an'ireo faritra hafa manamorona ny morontsiraka atsinanana dia nanakaiky na nihoatra ny salan'isa ny rotsak'orana (Sary 4).

Fanamarihana: Raha kely ny rotsakorana tokony ho izy (pluie normale) ao anatin'ny volana na telo volana ho an'ny toerana iray, dia mila fitandremana ny fampiasàana ny SPI. Mety tsy afaka ho ampiasaina mihintsy aza izany. Ireo toerana ireo dia voaloko volon-davenona.



Sary 3. Tondron'ny haintany SPI1 Jona 2026




Sary 4. Tondron'ny haintany SPI3 Jona 2026

Fotoanan'ny fampiakaram-boakatra sy fanaovana voly avotra izao.

D- VINAN'NY ROTSAKORANA

Andrasana ny rotsak'orana manakaiky ny salan'isa na mihoatra noho ny salan'isa any amin'ny faritra Diana, Sava ary Sofia, ary koa amin'ny ampahany lehibe amin'i Boeny, amin'ny ampahany amin'i Betsiboka, any amin'ny faritra atsimo andrefan'i Atsimo Andrefana, ary amin'ny toerana sasany any atsimon'i Androy sy Anosy. Etsy ankilany kosa, dia andrasana ny rotsak'orana manakaiky ny salan'isa na ambanin'ny salan'isa amin'ny faritra sisa manerana ny Nosy. (Sary 5).



Sary 5. Vinavina isam-bolana ny mety ho tahan'ny rotsakorana.
Loharano: Ny mety ho fizotry ny tonontaona. (DGM/DRDH/SVRC)

TOROLALANA HO FANAMORANA NY FAMAKIANA ITY GAZETY ITY

TOETRY NY ROTSAKORANA

Hafoloana: Fe-potoana 10 andro misesy .

Hafoloana voalohany: Andro voalohany ka hatramin'ny andro fahafolo ao anatin'ny volana (01-10).

Hafoloana faharoa: Andro faha iraka ambin'ny folo ka hatramin'ny andro faha roapolon'ny volana (11-20).

Hafoloana fahatelo: Andro faha iraka ambin'ny roapolo ka hatramin'ny faran'ny volana (21-faran'ny volana)

Rotsakorana manan-danja hoan'ny fambolena: Izany hoe ny fatran'ny rotsakorana misy fiantraikany eo amin'ny hamandoan'ny tany na dia eo aza ny fientonan-drano.

SPI (Standardized Precipitation Index):

Ny SPI dia tondro maneho ny fatran'ny tsy fahampiana na ny fahamaroan'ny rotsakorana mandritra ny vanim-potoana iray mitaha amin'ny fatran'ny rotsakorana tokony ho izy. Ny tondro SPI ihany koa dia ahafahana miantoka ny fanaraha-maso ny vanim-potoan'ny fahamandoana sy ny fahamainana.

Mamaritra ny fiovan'ny rotsakorana isam-bolana ny SPI1 ary manamarika ny fiovan'ny tambatry ny rotsakorana telo volana kosa ny SPI3.

TOETRANDRO ANKAPOBENY MANOLOANA NY FAMBOLENA SY NY VINAVINA MIFANDRAIKA AMIN'IZANY

Ireto andininy manaraka ireto dia natao ho fanaraha-maso ireo karazam-boly an-tanety roa dia ny vary sy ny katsaka.

Ny halavan'ny tsingerin'ny voly izay arahi-maso:

- Voly vary miankina amin'ny rotsakorana:
 - 100 andro ho an'ny faritra Androy sy Atsimo Andrefana.
 - 150 andro ho an'ny faritra Alaotra Mangoro, Analamanga, Bongolava, Itasy, Vakinankaratra, Amoron'i Mania, Matsiatra Ambony, Ihorombe.
 - 120 andro ho an'ny faritra sisa.
- Voly katsaka miankina amin'ny rotsakorana:
 - 90 andro ho an'ny faritra Atsimo Andrefana et Androy,
 - 120 andro ho an'ny faritra sisa.

Fanombohan'ny vanim-potoana hita fa mety amin'ny famafazana : Hafoloana ahafahana manao ny famafazana noho ny fahafenoan'ny fepetra rehetra takian'ilay voly. Tsara ny manamarika fa ny fitambaran'ny fatran'ny rotsakorana sy ny fahatomombanan'ny filàna rano eo amin'ny voly anakiray no mamaritra ny fepetra takian'ny famafazana.

Araka izany, ny "**Tsy mbola mamafy**" dia midika fa tsy mbola voatondro ny daty fanombohan tsara ahazoana manatanteraka ny famafazana manoloana ny fitiliana sy ny vinavina rehetra natao.

Tondron'ny fahatomombanan'ny filàna rano na WRSI: Famantarana ny fahombiazan'ny vokatra araka ny fisian'ny rano.

Dikan'ny maribolana amin'ny tondron'ny fahatomombanan'ny filàna rano:

Tondron'ny fahatomombanan'ny filàna rano	Dikany
Tena tsara	Nahafa-po ny rano tamin'ny volana lasa ; ary mbola mahavaly ny filàna rano ny voly ny tahirin-drano anaty tany amin'ny volana manaraka.
Tsara	
Tsy ampy	Tsy nahafeno tsara ny filàn'ny voly ny rano tamin'ny volana lasa. Raha mitohy io tsy fahampiana rano io amin'ny volana ho avy dia hitombo ny olana sy ny fahapotehan'ny voly.
Tena tsy ampy	Raha mitohy ny tsy fahampiana rano amin'ny volana ho avy dia hitombo ny olana sy ny fahapotehan'ny voly. Ambany loatra ny tahan'ny rano voatahiry anaty tany hany ka tsy afaka miantoka ny filàn'ny voly intsony.
Fahalazoana	Nahitana olana ny rano tamin'ny volana lasa ka mety hiteraka fahaverezan'ny vokatra. Mety hitarika fahalazoan'ny zavamaniry sy fihenana'ny vokatra ny fitohizan'izany haintany izany.
Fiandohan'ny famafazana izay tara na tsy voafaritra	Tsy mbola voafaritra ny fotoana tsara hanombohana ny famafazana ary tara raha oharina amin'ny mahazatra na tsy mbola voafaritra ny fanombohana tsara amin'ny famafazana amin'ny vanim-potoana voatondro.
Fiantombohan'ny vanim-potoana azo antoka amin'ny famafazana	Tsy mbola voafaritra ny fotoana tsara hanombohana ny famafazana fa tsy tara raha oharina amin'ny mahazatra.

Vinan'ny toetry ny andro manoloana ny fambolena: vinavina ny fanombohan'ny vanim-potoana tsara ho an'ny famafazana/fambolena sy ny tondron'ny fahatomombanan'ny filàna rano ho an'ny volana ho avy mifanaraka amin'ny vinan'ny rotsakorana ambany indrindra ho an'io volana io.

Fisoratana anarana hisitrahana ny gazety isam-bolana momba ny toetrandro sy ny fambolena

Manasa anao handefa ny mailaka amin'ity adiresy ity smameteo@gmail.com, miaraka amin'ny antony : 'GAZETY ISAM-BOLANA MOMBA NY TOETRANDRO SY NY FAMBOLENA' – Fisoratana anarana »

Fifandraisana

**Rantsana misahana ny fambolena sy ny toetrandro
Sampan-draharaha misahana ny fampiharana ara-toetrandro
(S.A.M)**

smameteo@gmail.com

034 05 027 44

www.meteomadagascar.com